

KENYATAAN ULAMA TENTANG ISIL ATAU ISIS

Mukaddimah

Isu ISIS atau ISIL begitu hangat mutakhir ini, sementelahan lagi berita tersebar secara terbuka melalui media massa dan laman sesawang yang mempromosikan atau membincangkannya. Terdapat di kalangan rakyat Malaysia yang terbabit sehingga menimbulkan pelbagai pendapat dan pandangan berkenaan isu Negara Islam atau Daulah Islamiyyah di Iraq dan Syam. Justeru kertas kerja ini dikemukakan untuk sama-sama dibahaskan agar difahami hakikat ISIS dengan lebih mendalam. Penulis sempat menghadiri satu wacana bertajuk "Kumpulan Negara Islam: Jihadis Atau Militan?" Antara panelnya ialah Yang Berbahagia Tan Sri Musa Hasan mantan ketua polis Negara menyebut: "Bahawa kerajaan tidak pernah memberi apa-apa sokongan terhadap golongan ini. Ini kerana keganasan dihalu juga kepada orang awam dan sesama sendiri."

Lebih menghairankan, ISIS yang kononnya ingin menegakkan Islam dan mendirikan Khilafah sering bertindak jauh di luar batas-batas Islam dan kemanusiaan. Sukar untuk dipercayai seorang yang ikhlas ingin melaksanakan Islam terpesong begitu jauh membunuh sewenang-wenangnya dan dengan cara yang kejam. Bahkan, sesuatu yang agak pelik seseorang yang mengaku sebagai pejuang Islam tetapi berakhlak buruk seperti mereka. Perbuatan mereka bukan sahaja jauh dari sifat Islam bahkan memberi gambaran yang amat keji kepada Islam dan pejuang-pejuang Islam.

Risalah ini akan membincangkan secara khusus berkenaan tajuk ini Kenyataan Ulama Tentang ISIL atau ISIS serta pengenalannya.

Pengenalan ISIL

Baru-baru ini kita dikejutkan dengan satu kumpulan yang digelar sebagai ISIL atau ISIS. Maklumat berkenaan dengan mereka didapati bahawa ISIL atau ISIS ini dikenali dengan Negara Islam Iraq dan Jajahannya atau Negara Islam Iraq dan Syria dan Negara Islam Iraq dan Sham (*al-Dawlah al-Islamiyah fi al-Iraq wa-al-Sham*), dengan singkatannya ISIL, ISIS, atau dari singkatan Bahasa Arab sebagai Dāish kini dikenali sebagai Negara Islam (IS) (*al-Dawlah al-Islamiyah*), adalah negeri yang tidak diiktiraf dan aktif berjihad dengan kumpulan militan di Iraq dan Syria.

ISIS berterusan melakukan perkara yang pelik dan tidak dapat diterima oleh umat Islam umumnya. Pada 29 Julai 2014 bersempena 1 Ramadhan 1435, ISIS telah mengisytiharkan berdirinya Khilafah Islam di kawasan yang dikuasai mereka dari timur Syria hingga ke utara Iraq. Namun sebahagian besar kawasan ini adalah padang pasir dan tidak berpenghuni. Pemimpin ISIS, Abu Bakar al-Baghdadi dilantik sebagai khalifah mereka. Mereka juga mengeluarkan fatwa mewajibkan seluruh umat Islam di dunia melafazkan bai'ah (taat setia) kepada mereka. Perisytiharan khalifah ini juga menyebabkan semua jamaah Islam dan kumpulan mujahidin hendaklah dibubarkan kerana semua umat Islam mesti berada di bawah satu khalifah.

Kenyataan Rasmi Kesatuan Ulama Syam (Rabitah Ulama' al-Sham)

“Segala puji bagi Allah SWT yang menurunkan al-Quran dengan kebenaran dan keseimbangan untuk membantu rakyat untuk hidup dengan keadilan. Selawat dan salam kepada Rasulullah SAW Muhammad, guru kepada semua manusia, yang menyambut seruan Tuhannya dengan penuh hikmah dan nasihat yang baik.

Allah Yang Maha Berkuasa telah memberkati kami di negara Syam, Syria untuk melawan *jihad fi sabilillah* terhadap rejim penjenayah. Walaupun sakit dan terkorban, kejamnya musuh dan pengkhianatan saudara-saudara dan bukan saudara, alhamdulillah Allah SWT menyokong kami dengan pertolongan-Nya dan mengurniakan kami dengan kemenangan yang tidak dijangkakan.

Perbezaan besar jihad di negara Syam, Syria sejak hari-hari awal kewujudannya adalah mempunyai tujuan yang jelas dan ia adalah semata-mata *fi sabilillah* tanpa tersasar daripada matlamat atau tujuan sebenarnya dengan keupayaan sederhana tentera dan sumber kewangan kami. Alhamdulillah!

Kemudian fitnah muncul di bumi kami dengan penampilan kumpulan tidak dikenali yang mengharapkan kesetiaan orang awam kepada pemimpin-pemimpin yang tidak dikenali dan mempunyai agenda peribadi. Mereka mengisytiharkan semua umat Islam untuk setia kepada seorang lelaki.

Oleh itu, kami mengeluarkan kenyataan pertama mengenai ISIS dan berharap fitnah ini berhenti sebelum menjadi lebih besar. Kami telah memaklumkan kepada mereka betapa bahayanya tindakan mereka di peringkat dalaman dan pada imej *Jihad fi sabilillah*. Perkara pokok adalah menyebarkan fitnah di kalangan Mujahidin di Syria, mewujudkan musuh baru di peringkat antarabangsa terhadap Mujahidin kita dan rakyat Syria secara umum. Kami berharap mereka memahaminya.

Tetapi, kejahatan mereka semakin berleluasa dan tindakan mereka tidak boleh dikompromi lagi. Terdapat pihak yang menyokong ISIS dan mula memerangi kumpulan Islam lain yang lebih lemah. Mereka membunuh Mujahideen lain hanya kerana mereka menolak untuk menyatakan taat setia kepada ISIS dan enggan menyokong ideologi yang berbeza.

Oleh itu, kami mengeluarkan kenyataan kedua daripada ulama Islam kepada kumpulan Mujahid di Syria. Apakah masalahnya dengan sesetengah orang? Jihad datang untuk membantu golongan teraniaya dengan rahmat dan kuat menentang musuh bukan sebaliknya. Sila jaga orang yang lemah dan janganlah melayan mereka dengan kejam sebelum fitnah ini tersebar.

Pada orang-orang yang jujur, kongsilah kenyataan dakwah kami untuk menghentikan fitnah sebelum ia tersebar lebih luas dan mengganggu Jihad terhadap musuh kami atau melemahkan umat kita dalam pergaduhan dalaman

Pencinta umat kita, ulama terkenal dan ustaz pergi kepada mereka dengan nasihat yang baik dan tulus jujur tetapi ia hanya menyerang kembali pada kami dan ia menjadikan mereka lebih degil, agresif dan tiada belas kasihan.

Mereka memaksa kami memberitahu apa yang Allah telah firmankan:

وَإِذْ أَخَذَ اللَّهُ مِيثَاقَ الَّذِينَ أُوتُوا الْكِتَابَ لَتُبَيِّنُنَّهُ لِلنَّاسِ وَلَا تَكْتُمُونَهُ

Maksudnya: "Dan (ingatlah) ketika Allah mengambil perjanjian setia dari orang-orang yang telah diberikan Kitab (iaitu): "Demi sesungguhnya! Hendaklah kamu menerangkan isi Kitab itu kepada umat manusia, dan jangan sekali-kali kamu menyembunyikannya".

(Surah Ali Imran: 187)

Untuk memastikan jihad diteruskan dan tugas menasihati ummah sebagai tanda cinta dan kasihan pada yang buta hatinya.

لِيَهْلِكَ مَنْ هَلَكَ عَنْ بَيِّنَةٍ وَيَحْيَىٰ مَنْ حَيَّ عَنْ بَيِّنَةٍ

Maksudnya: "Supaya orang (kafir musyrik) yang binasa itu, binasa dengan keterangan (yang membuktikan kesalahannya), dan supaya orang (Islam) yang hidup itu, hidup dengan keterangan (yang membuktikan kebenarannya)."

(Surah Al-Anfal: 42)

ISIS telah memperkenalkan beberapa fitnah baru dan kejahatan dalam negara kita, antaranya:

- Pencerobohan ke atas rakyat Syria dan memperbodohkan mereka mengisytiharkan negara tanpa kehadiran sebenar mana-mana komponen yang realistik atau mana-mana kesahihan ini. Mereka melakukannya tanpa nasihat atau kelulusan mana-mana rakyat tempatan, ulama dan tanpa menghubungi sesiapa di negara ini.
- Tuntutan monopoli Islam kepada mereka, dan menuduh orang lain bodoh, pengkhianat dan lain-lain serta menghina mana-mana orang yang tidak menyertai mereka.
- Melampau dalam menuduh orang yang kufur dan menguji orang padanya untuk membuktikan yang mereka kuffar sehingga mereka terpaksa mengaku Kafir. Mereka mengancam membunuh orang Islam lain dan Mujahidin dan ia merupakan perbuatan biasa mereka. Pemimpin tidak menafikan perbuatan terkutuk ini secara peribadi.
- Mereka menuduh sesiapa yang tidak bersetuju dengan mereka sebagai pengkhianatan dan kufur walaupun dia adalah dari orang-orang yang dimuliakan dan lebih awal berjihad sebelum mereka.

- Terus enggan untuk merujuk perkara-perkara atau perselisihan faham dan konflik kepada mahkamah Syariah Islam Tempatan kecuali mahkamah yang tertakluk kepada keputusan mereka sahaja, seolah-olah mereka memonopoli Islam untuk kumpulan mereka sahaja.
- Menjadi duri dalam daging dengan bertempur di belakang bertujuan untuk meluaskan wilayah mereka dengan mengambil tanah Mujahidin yang bebas. Jika gagal menguasai kawasan tersebut, mereka sengaja mengaku kawasan tersebut hak mereka dan mengalih arah Mujahidin daripada memerangi tentera Assad dan menyebabkan mereka terpaksa berperang sesama mereka. Mereka telah berjaya mengambil alih kawasan strategik seperti kawasan ekonomi, simpanan petrol, pusat pemeriksaan tentera utama di kawasan yang telah dibebaskan. Mereka merampas dari Mujahidin kami dengan kekerasan.
- Sengaja mengganggu Mujahidin dan kumpulan-kumpulan Islam dengan menyebarkan maklumat palsu tentang mereka dan penglibatan dalam pertumpahan darah umat Islam. Mereka memandang rendah nilai darah Muslim.
- Penangkapan dan gangguan kepada mujahidin, ulama, pendakwah, ulama, wartawan dan aktivis kami. Mereka menyoyal siasat mereka dan menghalang kerja-kerja bantuan dan sokongan. Mereka juga menuduh semua NGO sebagai pengkhianat dan bekerja dengan musuh.
- Menempa masalah palsu antara mujahidin sehingga membawa kepada fitnah, pembunuhan, perpecahan dan melemahkan usaha menentang musuh kami.

Kami hanya taat kepada perintah-perintah Allah SWT dan kami sediakan mereka nasihat ketiga dan terakhir untuk mengelakkan apa yang berlaku kepada Jihad di negara-negara lain berlaku kepada kami di Syria. Kami menyeru:

I. Pemimpin ISIS untuk bangun dan mendengar nasihat yang jujur agar dapat membetulkan tindakan mereka dengan segera dan menghentikan kesilapan-kesilapan mereka. Tentera mereka tidak dinibarkan untuk kekal dalam organisasi ini selagi kesilapan-kesilapan ini berterusan.

II. Kami tidak menyalahkan ISIS untuk kesalahan dan jenayah yang kami tidak pernah tahu sebelum mereka datang. Kami tidak akan bertanggungjawab jika ada perkara yang terjadi yang menyebabkan mereka terbunuh atau perlakuan mereka yang menyebabkan mujahidin terpaksa menyerang mereka untuk mempertahankan diri dan keluarga daripada ISIS pada masa hadapan.

وَلَمَنْ انْتَصَرَ بَعْدَ ظُلْمِهِ فَأُولَئِكَ مَا عَلَيْهِمْ مِّنْ سَبِيلٍ ﴿٤١﴾ إِنَّمَا السَّبِيلُ عَلَى
الَّذِينَ يَظْلِمُونَ النَّاسَ وَيَبْغُونَ فِي الْأَرْضِ بِغَيْرِ الْحَقِّ ۚ أُولَئِكَ لَهُمْ عَذَابٌ
أَلِيمٌ ﴿٤٢﴾

Maksudnya: "Dan sesungguhnya orang yang bertindak membela diri setelah ia dizalimi, maka mereka yang demikian keadaannya, tidak ada sebarang jalan hendak menyalahkan mereka. Sesungguhnya jalan (untuk menyalahkan) hanyalah terhadap orang-orang yang melakukan kezaliman kepada manusia dan bermaharajalela di muka bumi dengan tiada sebarang alasan yang benar".

(Surah Ash-Shuraa: 41 dan 42)

III. Kami menyeru kepada ulama yang sederhana dalam ISIS, yang masih dihormati di ahli-ahli mereka sendiri, terutama yang telah lama di dalam ISIS untuk mengatakan kebenaran tentang perkara ini dan mengambil pendirian berani tentang perbuatan-perbuatan yang salah daripada pemimpin dan ahli-ahli baru mereka.

IV. Kami menyeru kepada penyokong jihad di Syria untuk menyiasat di mana wang derma mereka pergi. Mereka perlu pastikan bahawa wang mereka tidak pergi untuk membunuh orang Islam atau Mujahid yang lain hanya kerana dia enggan menyertai ISIS.

V. Kami menyeru semua keluarga tempatan, brijed dan mujahidin yang telah disakiti, ditindas atau diserang oleh ISIS untuk bersabar. Mereka diharap tidak memerangi atau membalas dendam terhadap ISIS. Ingatlah! Orang yang bersabar dicintai oleh Allah swt.

VI. Kami menyeru kepada kumpulan-kumpulan kecil Mujahidin jika mereka diancam oleh ISIS, maka sertailah salah satu daripada tentera Islam yang terbesar di Syria. Mereka lebih kuat, lebih terkenal dan lebih ditakuti oleh Syiah daripada kumpulan-kumpulan kecil yang bersembunyi di belakang-belakang bangunan.

Ya mujahidin, ini merupakan masa yang sukar dan fitnah datang dari segenap penjuru. Inilah saat yang membezakan hati yang baik dengan yang buruk.

مَا كَانَ اللَّهُ لِيَذَرَ الْمُؤْمِنِينَ عَلَىٰ مَا أَنْتُمْ عَلَيْهِ حَتَّىٰ يَمِيزَ الْخَبِيثَ مِنَ الطَّيِّبِ

Maksudnya: "Allah tidak sekali-kali akan membiarkan orang-orang yang beriman dalam keadaan yang kamu ada seorang (bercampur aduk mukmin dan munafik, bahkan Ia tetap menguji kamu) sehingga Ia memisahkan yang buruk (munafik) daripada yang baik (beriman)".

(Surah Ali Imran: 179)

Oleh itu, bersabarlah dan sucikanlah hati kamu. Sentiasa berusaha kerana Allah SWT. Anda ditinggikan martabat jika anda beriman. Allah sentiasa bersama kamu dan Dia tidak akan meninggalkan kamu."

Fatwa Individu

1. Syeikh Dr Yusuf Al-Qaradhawi (Presiden Ittihad 'Alami lil Ulama' Al-Muslimin)

Tokoh ulama terkemuka, Profesor Dr Yusuf Al-Qaradhawi membuat pengumuman

bahawa pemerintahan Khalifah Islam diwujudkan oleh Kumpulan Negara Islam Iraq dan Jajahannya (ISIL) adalah melanggar undang-undang Syariah.

Pengumuman itu dibuat selepas ISIL mengisytiharkan Kerajaan Khilafah Islam di kawasan yang mereka tawan di Iraq dan Syria serta memerintahkan umat Islam di seluruh dunia supaya akur terhadap ketua pemimpin mereka Abu Bakr al-Baghdadi.

Dr Yusuf al-Qaradhwawi berkata dalam satu kenyataan bahawa pengakuan gerakan itu tidak diakui di bawah undang-undang Syariah.

2. Syeikh Abdul Aziz al-Tarifi

Beliau berpendapat bahawa golongan ISIS adalah: *"Khawarij dan menyertai dibawah benderanya tidak harus sama sekali."*

3. Prof Dr. Ahmad al-Raysuni (Naib Presiden, *Ittihad al-'Alami li Ulama' al-Muslimin*)

Seorang ulama pakar Maqasid Syariah dari Maghribi, Prof Dr. Ahmad al-Raysuni, memberikan komentar bahawa deklarasi berdirinya Khilafah al-Islamiyah yang diumumkan (oleh Daulah Islam Iraq wa Syria - ISIS) tidak lebih hanyalah sebuah angan-angan, fatamorgana, dan mimpi baik ditinjau daripada sudut realiti ilmiah mahupun syariah.

Dalam laporan akhbar al-Tajdid (Selasa, 1 Julai 2014), Dr. Ahmad al-Raysuni menambah bahawa pada ketika ini umat Islam di pelbagai negara berdepan dengan para penguasa diktator yang menindas mereka dengan kekuatan senjata. Pada waktu yang sama tiba-tiba muncul sebuah organisasi baharu dan mendeklarasikan berdirinya khilafah dengan kekuatan senjata, lalu mengangkat seorang khalifah yang juga dengan kekuatan senjata, lantas memaksa kelompok lain untuk tunduk dan memberikan loyaliti sepenuh kesetiaan kepadanya dengan perkataan dusta, *"Barangsiapa menguasai rakyat maka (baiah) ketaatan kepadanya adalah wajib."*

Jelas Dr. Ahmad al-Raysuni, kekhalifahan ini adalah khurafat belaka, deklarasi berdirinya khilafah ini tidak lain adalah sebuah khayalan yang dilakukan oleh orang-orang tidak berakal. Janji setia dilaksanakan oleh orang-orang yang tidak dikenali kepada orang yang juga tidak dikenalnya. Kita tidak tahu mereka ada di mana, di padang pasir atau gua. Oleh karena itu kewajiban untuk memberikan kepatuhan hanyalah terikat kepada orang-orang yang berkait sahaja.

Dalam hal ini beliau menukilkan perkataan Umar bin Khattab r.a yang diriwayatkan di dalam Sahih al-Bukhari bahawa:

مَنْ بَايَعَ رَجُلًا عَنْ غَيْرِ مَشُورَةٍ مِنَ الْمُسْلِمِينَ فَلَا يُبَايِعُ هُوَ وَلَا الَّذِي بَايَعَهُ، تَعَرَّةٌ أَنْ يُقْتَلَ

"Sesiapa yang membaiah seseorang lelaki tanpa melalui permesyuaratan di kalangan orang-orang Islam, janganlah kamu mengikutinya, iaitu orang yang dibaiah dan orang yang memberi bai'ah. Ditakuti kedua-duanya akan dibunuh."

(Rujuk Syarh Fath al-Bari, juz. 2: 144)

Oleh kerana itu, menurut Dr. Ahmad al-Raysuni lebih tepat kalau dikatakan bahawa di Iraq sedang berlaku siri-siri suntingan filem. Tetapi naifnya, untuk memaparkan tontonan ini ia harus melalui dengan kaedah pertumpahan darah. Padahal yang sebenarnya, isu di Iraq ini adalah salah satu akibat daripada rangkaian kezaliman yang dialami rakyatnya sejak dahulu lagi, bermula dari masa Saddam Husein, penjajahan Amerika, dan pemerintahan Syiah (Nouri al-Maliki) yang didokong oleh Iran.

4. Syeikh Rashid Ghannoushi (Pengerusi Parti Nahdhah)

Beliau sebagai pengerusi Parti Nahdah dan anggota Majlis Penasihat bagi *Ittihad al-'Alami li Ulama' al-Muslimin* memberi penjelasan bahawa Negara Madinah yang ditegakkan oleh Nabi SAW di asaskan kepada anak watan dan kehidupan yang harmoni antara pelbagai agama dan keturunan. Beliau menggesa untuk melihat kepada perlembagaan Madinah yang memberi jaminan keselamatan dan hak untuk mereka. Beliau mempertikaikan bentuk pemerintahan dan negara yang cuba ditubuhkan oleh pihak ISIS di Iraq dan Syria yang membawa kepada tindakan zalim dan kejam tanpa sebarang pertimbangan sehingga mengorbankan ramai orang awam.

5. Syeikh Dr. Ali al-Qaradaghi (Setiausaha Kesatuan Ulama Sedunia)

Dr. Ali al-Qaradaghi berpendapat bahawa gerakan ini tidak syarie dan apa yang berlaku, kumpulan ini membunuh golongan-golongan yang tidak bersalah. Sebaliknya beliau menuntut kepada umat Islam berjihad membantu dari sudut kewangan di Syria dan berjihad untuk membangunkan Negara Islam yang mundur. Beliau mempersoalkan di mana ulama-ulama yang muktabar dari kumpulan ISIS dan mereka tidak berjaya membawa walau seorangpun ulama dari kalangan mereka yang dianggap muktabar.

6. Syeikh Abdul Muhsin Bin Hamad al-'Abbad al-Badr (Ulama Besar Arab Saudi)

Beliau berkata: *"Hendaklah para pemuda menarik diri dari mengikut kumpulan ini dan kembali kepada pangkal jalan tanpa berfikir untuk bersama dengan mereka."*

7. Syeikh Sulaiman al-'Ulwan

Beliau berpendapat: *"Abu Bakar al-Baghdadi tidak dipilih oleh Ahl Hal wa al-'Aqdi. Kalaulah ketuanya yang asal Aiman al-Zawahiri tidak redha dengan perbuatannya, bagaimana mungkin dia boleh meminta bai'ah daripada orang lain. Justeru, dia bukanlah khalifah orang Islam sehingga boleh melakukan apa saja."*

8. Syeikh Dr. Yusuf al-Ahmad

Beliau berpendapat: *"Bahawa Abu Bakar al-Baghdadi tidak mempunyai wilayah*

syarie, justeru tidak harus berperang di bawah benderanya."

9. Syeikh Usamah al-Rifaie (Pengerusi Ulama Syam)

Beliau berpendapat: *"Golongan Daish tidak takut kepada Allah dan menghalalkan darah orang Islam, perbuatan seperti itu boleh membawa kepada kufur."*

Syeikh Usamah juga berharap agar golongan pemuda yang tidak mengetahui agama Allah dengan sebaiknya berkenaan dengan golongan Daish yang hanya merasakan semangat semata-mata semoga Allah memberi hidayah kepada mereka. Syeikh berdoa dan berharap agar pemuda kembali kepada Allah.

Fatwa Institusi atau Badan Berautoriti

Terdapat banyak fatwa rasmi dan tidak rasmi dikeluarkan oleh badan-badan berautoriti, antaranya:

1. Darul Ifta' Mesir

Keputusan yang dikemukakan oleh Darul Ifta' seperti kata Dr. Ibrahim Najm penasihat Mufti Mesir: Bahawa menyertai kumpulan Da'ish atau ISIL adalah haram pada hukum syara' kerana:

- Ia mengakibatkan kehancuran Negara dan gambaran yang buruk terhadap Islam pada pandangan dunia.
- Mereka tersasar dalam mengistinbatkan dalam syara' bagi menghalalkan sebarang tindakan mereka yang menumpahkan darah.
- Mereka dianggap sebagai golongan pengganas yang menggerunkan sehingga boleh menyebabkan banyak kemaslahatan bagi pihak musuh-musuh Islam yang sudah pasti mengambil kesempatan.

2. Jabhah Ulama al-Azhar

Mereka menyeru semua golongan di Iraq supaya menghidupkan kerja sama antara semua pihak tanpa menumpahkan darah dan pembunuhan terhadap rakyat jelata.

3. Jabhah Ulama Halab Syria

Mereka berpendapat: *"Sama ada kamu pergi ke Iraq atau kamu bersama dengan kumpulan yang lain dalam masa tiga hari. Kalau tidak maka kamu layak dikenakan had hirabah."*

4. Rawabit Ilmiah Islamiyyah Syria

"Mereka seumpama golongan khawarij terdahulu yang tidak ingin kembali kepada syariat Allah bahkan bertambah dalam kesesatan. Mereka sanggup membunuh orang Islam."

5. Kenyataan 47 Ulama Saudi

Antara mereka, Syeikh al-Ghunaiman, al-Umar, al-Mahmud, dan al-Jallali. Mereka berpendapat: *"Bahawa golongan Daish termasuk dalam golongan Khawarij. Justeru diberi peringantan supaya tidak bersama dengan mereka."*

6. Persatuan Ulama Islam Iraq

Mereka telah mengeluarkan fatwa bahawa golongan ini dianggap sebagai golongan takfir yang sesat cuba menjuzu'kan Negara Iraq dengan menyebarkan keganasan.

Kenyataan Mufti Wilayah Persekutuan Isu ISIS/ISIL

Berdasarkan kepada pandangan badan fatwa yang berwibawa serta berautoriti dan pendapat tokoh ulama yang muktabar, maka kami berpendapat sama seperti di atas iaitu sokongan dan dokongan terhadap kelompok ISIL atau ISIS adalah bercanggah dengan Syariah Islam yang sebenarnya.

Melihat kepada syarat Khilafah Islamiyyah seperti yang dinukilkan oleh al-Imam al-Mawardi dalam *al-Ahkam al-Sultaniyyah* dan lain-lain lagi jelas menunjukkan syarat-syarat adalah tidak menepati kepada ISIS dalam pelaksanaan Negara Islam atau Khilafah.

Seruan jihad yang dibawa oleh mereka bercanggah dengan konsep di dalam fiqh Islam yang menyatakan jihad bersifat fiqh jamaah yang memerlukan izin daripada kerajaan yang sah. Dan jihad yang dibawa oleh mereka meragukan kerana terdapat kes-kes pembunuhan ke atas mereka yang tidak bersalah seperti wartawan dan sebagainya.

Sepatutnya kita menginsafi diri kita dengan mencari pelbagai ruang dalam memartabatkan syiar Islam di Negara kita dan juga menghulurkan pelbagai bentuk bantuan terutamanya perubatan dan makanan kepada mereka yang berada di kem pelarian di sempadan Turki, Lubnan, Iraq, Jordan dan lain-lain.

Sekali lagi ditegaskan bahawa umat Islam di Malaysia hendaklah menjauhi kumpulan ISIS dan tidak perlu memberi sebarang bantuan serta kerjasama terhadap kumpulan ini.

Semoga Allah memberi taufiq dan hidayah serta ilmu kefahaman yang sebenar berkaitan Islam kepada kita semua dalam mencari keredhaan-Nya. Amin.

Akhukum Fillah,

Dr. Zulkifli Mohamad Al-Bakri
Mufti Wilayah Persekutuan